

La ARLeF a FriuliDOC, fra dolçs tipics, zûcs pai fruts e storiis par furlan

Ae scuvierde dai savôrs de scaletarie tipiche furlane e pai plui piçui un laboratori par fâ fieste pai 10 agns di "Maman!"

Profum di biscots a pene gjavâts dal for, storiis che a san di tradizion e ridadis di fruts: a Friuli Doc, la lenghe furlane e torne protagoniste graciis ae ARLeF. La Agenzie regionâl, graciis ae colaborazion cul Comun di Udin e cun Coldiretti F-VJ, e rinove la sô presince ae manifestazion cuntun program che al met adun savôrs antîcs, curiositâts dutis di scuvierzi e ativitâts pensadis pes fameis.

DOLÇS FURLANS... CUI JU COGNOSSIAL? - Sabide ai 13 di Setembar, aes 11, te cort di Palaç Morpurgo, tal spazi Coldiretti F-VJ l'apontament al è cun "**Dolçs furlans... Cui ju cognossial? - Scaletarie de tradizion. Liendis e segrets**". Un viaç golôs fra storie, curiositâts e savôrs.

Il condutôr dal event al sarà **Marcutti**, il "Friulencer" cun milions di visualizacions, une ironie vivarose e... tant Friûl. I protagoniscj a saran **Nicolas Fonzar**, cognossût pal canâl Youpaltubo, che aromai al è un dai canâi YouTube plui preseâts dai furlans, e **Danilo D'Olive**, storic scaletîr di *Il Laboratorio del Dolce* di Udin. Fonzar, che te sô rubriche *Mangjâ e murî* al invade in mût inmagant e apassionât a scuvierzi la origjin di plats e prodots dal teritori, al presenterà un gnûf video denant vie, che al è dedicât propit ai dolçs furlans. D'Olive, grant artisan dal gust che si misure di simpri cun ricetis antighis de nestre tradizion, al contarà al public storiis e segrets de scaletarie furlane, cuntune atenzion particolâr ai biscots. Al alternarà ricetis che lui stes al à cjapât sù di fonts locâls tal cors de sô lungje cariere, cun altris, tiradis fûr dal volum "Mangiare e ber friulano", ricetari innomenât de cuisine tradizionâl furlane, scrit de contesse Giuseppina Perusini Antonini. Pal public di Friuli Doc e sarà pardabon une biele ocasion par scuvierzi cualchi dolç aromai pôc cognossût, di chei che si fasevin une volte pes fiestis impuartantis. Come i "colaçs", i biscots che a vignivin leâts insiemi par formâ une golaine e metûts tor il cucl dai zovins che a lavin di Cresime. Dut câs e sarà soledut la ocasion par cerçâju, stant che ae fin dal event e sarà une degustazion.

BON COMPLEAN MAMAN! - Il Friuli Doc de ARLeF al larà indenant, **simpri sabide ai 13 di Setembar, aes 16.30, te Sezion Moderne de Biblioteche Civiche "V. Joppi"**, cun "**Bon complean Maman!**", un dopomisdì di zûcs e animazion par furlan dedicât ai plui piçui e aes lôr fameis. L'event, inmaneât de ARLeF in colaborazion cul Comun di Udin, cu la Biblioteche e Telefriuli, al festezarà i 10 agns de trasmission televisive par furlan che ur plâs tant ai fruts. La diesime stagjon e tacarà propit in Otubar.

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

Protagonistis di cheste "fieste di complean" a saran la famose condutore **Daria Miani**, la sô "vicine di cjase" **Desiree Chiappo Debegnach** e la vivarose "**cusine Bete**". A cjaparan dentri i fruts intun laboratori divertent e no mancjaran sorpresis e gadgets par ducj. Il laboratori al è indreçât ai fruts dai 4 ai 10 agns. Par partecipâ bisugne notâsi dentri di vinars ai 12 di Setembar, scrivint ae direzion email info@sportelfurlan.eu.

FURLAN DOC - Nol è dut chi: par dute la durade de manifestazion, la ARLeF e sarà presinte tal spazi "**Furlan DOC - La vetrine de lenghe furlane a Friuli DOC**". Coordinade dal Comun di Udin, la iniziative e met adun ents, associazions e editôrs impegnâts te promozion de lenghe furlane. Il bancut, logât in vie Marcjât vieri, al sarà juste apont une vetrine de lenghe furlane che e fasarà scuvierzi tantis novitâts, ativitâts e materiâi informatîfs promovûts di dutis lis realtâts che a partecipin. Il spazi al restarà viert joibe ai 11 di Setembar des 18 aes 22 e di vinars a domenie cun orari continuât des 10 aes 22.

Friuli Doc si confermarà cussì, ancje intal 2025, une ocasion preziose par riscuvierzi e condividi il valôr dal patrimoni linguistic e culturâl furlan.

Udin, ai 5 di Setembar dal 2025

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<